

Potpisivanje Memoranduma o saradnji udruženja sudija i tužilaca u Bosni i Hercegovini

Uloga i doprinos udruženja u procesu reforme pravosuđa – Stanje i perspektive

Hotel Evropa, Sarajevo, ponedjeljak 12. 10. 2020.

Udruga tužilaca FBiH, Udruga sudija FBiH, Udruga sudija u BiH i Udruga žena sudija u BiH su u Sarajevu 12. oktobra 2020. godine potpisali Memorandum o razumijevanju i saradnji između udruženja sudija i tužilaca Bosne i Hercegovine. Ovim je okončan višemjesečni rad na uspostavljanju institucionalnog okvira koji osigurava jačanje i unapređenje nezavisnosti, nepristrasnosti, odgovornosti, efikasnosti i transparentnosti tužilaca i sudija. Memorandum je izraz potrebe, da se članstvo postojećih udruženja aktivno i konstruktivnije angažira na definiranju i zaštiti integriteta i profesionalnog statusa nosioca pravosudnih funkcija. Potpisivanjem je napravljen prvi korak prema snažnijem utjecaju sudija i tužilaca na reformske procese i na efikasno rješavanje problema koji se gomilaju u pravosuđu. Memorandumom je konstituirano Zajedničko koordinaciono tijelo koje će osigurati efikasnu i usklađenu akciju i otkloniti slabosti koje donosi rasparčanost strukovnih udruženja.

Potpisivanju memoranduma je prethodilo predstavljanje rezultata ankete u kojoj su se sudije i tužioci izjasnili o prioritetima, slabostima i potrebama strukovnih udruženja. Učesnici su saglasni da pred udruženjima stoji aktivan rad posebno u pogledu iniciranja analiza, preporuka i stavova, zatim rad na podizanju i zaštiti ugleda i dostojanstva, kao i promoviranje institucionalne i individualne odgovornosti sudija i tužilaca. Osnivanje Zajedničkog koordinacionog tijela je prvi važan korak na ostvarivanju ovih ciljeva. Memorandum je otvoren za pristup i drugim udruženjima iz BiH.

Svečana ceremonija potpisivanja je dopunjena raspravom o unapređenju rada udruženja. Ona je obuhvatila mnogobrojne aspekte organizacione prirode kao otvorena pitanja oko saradnje i partnerstva sa upravnim, zakonodavnim i regulatornim tijelima u BiH.

Pored potpisnika memoranduma, u raspravi su učestvovali tužilac Tužilaštva BiH, Džermin Pašić i član Upravnog odbora Udruženja tužilaca, Ranko Nuić. Ispred Centra za javno pravo potpisivanju memoranduma je nazočio prof. dr. Edin Šarčević, a ekspert EU za pravosuđe sudija Kees van der Weide pozdravio je ovaj događaj kao iskorak u ispunjavanju preporuka iz Izvještaja eksperata o stanju vladavine prava u Bosni i Hercegovini iz decembra 2019. godine, u kojem se ističe potreba za konstruktivnijom ulogom strukovnih udruženja sudija i tužilaca u procesu reforme pravosuđa.